

Xojon carta-la San Pablo xi ma-ne jò xi kiski-la Timoteo

Kó tsò Pablo nga síhixat'aà Timoteo

¹ 'An, Pablo, tikji-lè xojon jè. Nga 'an tsibíxáya-na Jesucristo nga k'oaá s'ín kjòmejèn-la Nainá. K'oaá s'ín kitsjaà tso'ba Nainá nga kíjnakon inima-ná it'aà ts'e Cristo Jesús. ² Ngaji Timoteo xi 'ño matsjake-lè koni tsà ki'ndí ts'an xan-lè, Nainá xi Na'èn-ná ko Na'èn-ná Jesucristo kàtatsjá-lè kjondaà, kàtahimakeè-lè, kàtas'e-la kjoa'nchán jjiin inima-lè.

'Én xi tsjá Pablo it'aà ts'e Cristo

³ Miki jchàajiin-na ko nachrjein ko nitjen bìtsi'batji-lè tikoá tsjaà-la kjondaà Nainá, jè xi 'an bexkoán koni s'ín kijtseèxkón jña xita jchinga-na nga nguì tsjeè tjín kjohítsjeèn-na. ⁴ K'e nga bìtsjeèn-na kjoa ts'e ndáxkoìin mejèn-na nga skoeè ijngò k'a-lè mé-ne nga kotsja-la inima-na. ⁵ Bìtsjeèn-na nga nguì ndaà mokjeiín-lè it'aà ts'e Cristo koni s'ín kòkjeiín ítjòn-la neájchá-lè Loida ko nea-lè Eunice. 'An k'oaá s'ín makixi-na nga ngaji tikoá ndaà mokjeiín-lè.

⁶ Koií k'oas'ín tsìkítsjeèn-lè nga isa ndaà tikjiín kjotjò xi kitsjaà-lè Nainá nga ndaà tixá-la, jè kjotjò xi kitjoé-lè k'e nga 'an tsakàsòn-lè ndsaa. ⁷ Nainá, mitsà inima tsakjón kitsjaà-ná. Jè kitsjaà-ná Inima Tsjeè-la nga tsjá-ná nga 'ño, nga tsjá-ná kjoatjòcha, nga tsjá-ná kjohítsjeèn kós'ín s'eén nga kixi sjjchá

yijo-ná. ⁸ Koií kjoa-là kì masobà-lè nga nokjoàkoií xita it'aà ts'e Na'èn-ná Jesucristo. Tikoá kì masobà-lè xi it'aà ts'an nga ndayá tìjna'ya koií kjoa-là nga ya sixát'aà-là Na'èn-ná. Tikjeiin-ko-ná kjo'in xi it'aà ts'e 'én ndaà-là Nainá xi kjoa ts'e Cristo. Jè Nainá tsjá-lè nga'ño xi kochjeén-lè. ⁹ Nainá, jyeé tsachjekàjìn-ná kjo'in. K'oaá s'in kùchja-ná nga tsjeè sjchá yijo-ná. Mìtsà koi kjoa-là nga ndaà ki'né. Koi-né nga k'oas'in kjòmejèn-là Nainá tikoá kitsjaà-ná kjondaà-là xi it'aà ts'e Cristo skanda tisa tàts'en-là kjoa k'e nga tikj'eè sindaà isò'nde. ¹⁰ I'ndeì Nainá jyeé tsakó kjondaà-là nga jyeé j'ì Jesucristo xi ochrjekàjìn-ná kjo'in. Jaàxìn-ná nga'ño-là kjoabiyaà. Xi it'aà ts'e 'én ndaà-là Nainá xi kjoa ts'e Cristo, tsakó-ná kjoabinachon tikoá tsakó-ná nga mìtsà jngoò k'a kiyá nita kjé-ne.

¹¹ Nainá, 'aán kisìngatsja-na xá jè nga 'an kichjàya 'én ndaà-là Nainá xi kjoa ts'e Cristo. Tsibíxáya-na it'aà ts'e xá-là nga 'an kokoòya-là jña xi mìtsà xita judío. ¹² Tseé kjo'in tìsikjaán tà jè ngatji-là 'én xi 'an chjàya. Tanga mìkiì masobà-na. Jyeé tjiìn-na nga it'aà ts'e Cristo mokjeiin-na. Tikoáá ndaà tjiìn-na nga ta jngoò jè Nainá xi tjin-là nga'ño. Ndaà sikkinda jè xá xi 'an kisìngatsja-na skanda jè nachrjein k'e nga kjoíì jngoò k'a-ne Jesucristo.

¹³ Ndaà tjiìn takoìn 'én ndaà xi 'an tsakoòya-lè koni s'in tjin 'én xi mokjeiin-ná kò kjoatjòcha xi tjin-ná nga Cristo titsajnaakoáá. ¹⁴ Ndaà tikitasoìn xá ndaà xi jì kjòngatsjei. Jè sùchját'aà-lè Inima Tsjeè-là Nainá xi tijnajìn inima-ná.

¹⁵ Jyeé tjiìn-lè ngats'ìì xi títajna nangui

Asia, jyeé kitsjeiìn takòn-na, koni jè Figelo ko Hermógenes. ¹⁶ Nainá kàtahimakeè xita ni'ya-la Onesíforo. Kjin k'a j'ii síjehikon-na. Mikii kjòsobà-la nas'in ndayá tijnaya. ¹⁷ Tà saá, k'e nga j'ii i Roma skanda mikii kisikjáya nga 'ño tshótsji-na skanda kó nga kisakò-la ñánda tijnáa. ¹⁸ Na'èn-ná kàtahimakeè jè Onesíforo k'e nga kijchò nachrjein-la Nainá. Ngaji jyeé ndaà tjiin-lè, ndaà kisichját'aà-ná ján Éfeso.

2

Timoteo, jngoò soldado-la Cristo xi ndaà síxá-la

¹ Ngaji Timoteo koni tsà ki'ndí ts'an xan-lè, tjiin-la nga'ño yijo-lè it'aà ts'e kjondaà xi tsjá Jesucristo nga jè titsajnakoaá. ² Jè 'én xi kina'yà-ná nga kichjáya nguixkon nga kjin ma xita xi kii'nchré, k'oaá s'in takóya-la xi xita kixi xi ndaà ma-la okóya mé-ne k'oa ts'in kokóya ngajo-la xita xi k'eií.

³ Ngaji Timoteo, tikjeiin-ko-ná kjo'in nga ndaà mì'aà-la Jesucristo koni jngoò soldado xi síkjeiin kjo'in. ⁴ Jngoò xita xi soldado síkitasòn mikii tji'nde-la nga k'eií xá skóngajiin xi tjin isò'nde, tjinè-la nga ya síkitasòn-la jè xi kitsjaà-la xá mé-ne nga ndaà kíjnako. ⁵ K'oaá ts'in tjin jè ts'e xita xi síská. Tsà mì kixii síská koni s'in tjin kjotixoma-la mikii tjoé-la chji-la. ⁶ Xita xi bínè-la yijo-la nga ndaà síxá nga bitje tsojmì tje, k'e nga jye kojchá tsojmì, jè tjoé ítjòn chiba-la tsojmì xi majchá koni tsà chji-la. ⁷ Tikítsjiin koni s'in tixan-lè. Jè Nainá isa ndaà tsjáya yije-lè kjohitsjeèn.

⁸ Tikítsjiin it'aà ts'e Jesucristo, jè xi jaáyajiin-la mik'en xi tje-la xitaxá ítjòn xi David kí'mì. K'oaá

tsò 'én ndaà-la Nainá xi kjoa ts'e Cristo xi 'an chjàya. ⁹ Koií kjoa-la 'én ndaà-la Nainá xi kjoa ts'e Cristo xi 'an chjàya, tsìkjaán kjo'in skanda na'ño kicha tít'aà'ñoá nga tìjna'ya ndayá koni jngòò xita xi 'ño ts'en. Tanga jè 'én-la Nainá mìtsà tít'aà'ño iya ndayá. ¹⁰ Koií kjoa-la tsìkjaán yije kjo'in xi kjondaà ts'e xita xi xó jaàjìn-ne Nainá mé-ne nga tìkoa kítjokàjìn-ne kjo'in xi it'aà ts'e Cristo Jesús; s'eé-la kjoajeya xi mìkì fehet'aà nita kjé-ne.

¹¹ 'Én koi, 'én kixi-ne nga tsò:

Nga ya k'en-koaá Cristo, tìkoaá yaá kítajnakon-koaá.

¹² Tsà chíkjoa-ná kjo'in tìkoaá yaá kotixomakoáá Cristo.

Tsà kixoán mìkì bexkoan, jè k'oaá tì kítso-ná mìkì bexkoan.

¹³ Tsà mìkì sítitasoán 'én xi nokjoá, tanga Nainá sítitasòn 'én xi chja.

Mìkì koma sítjatjya 'én-la.

Jngòò xita xi ndaà síxá-la Cristo

¹⁴ Tíkítseèn-la kjoa koi. Tìnokjoakoji nga nguixkon Nainá mé-ne nga mì kohótiya-ne kjoa ts'e 'én. Jè kjoa xi chitiya-ne nímé chí-là. Ta saá síkít'són xita xi 'nchré. ¹⁵ 'Ñó ndaà tìjìnè-la yijo-lè mé-ne nga ndaà kìjna-ne nga nguixkon Nainá. Nímé xi kosobà-lè nga ndaà tìjìn xá-lè koa ndaà okoòyi 'én kixi-la Cristo. ¹⁶ Kì taxki nokjoà-jèn 'én xi mìkì sasén-la Nainá xi nímé chí-là. Jña xita xi k'oas'ín chja, isaá 'ño binchat'aàxìn-isa-la Nainá. ¹⁷ Jña 'én xi ch'o tsò k'oaá ngaya-la koni ch'in nchikòn xi bi'ndo-ne yijo-ná. K'oaá s'ín chja Himeneo kò Fileto ¹⁸ nga jyeé chinchat'aàxìn-la

xi kjoakixi nga tsò: “Jè kjoa xi faáya-la mik'en jyeé tsato-né.” K'oaá ma-ne sískáya i'nga-la xita kjoa xi mokjeiin-la. ¹⁹ Tanga Nainá jyeé tsibijna'ño tãts'en jngoò kjoakixi ñánda tjit'aà 'én xi tsò: “Nainá beèxkon-né xi xita ts'e”; ngats'iì xi tsò: “An, xita-la Cristo-ná, kàtinchat'aàxìn-la kjoa xi ch'o tjin.”

²⁰ Jngoò ni'ya xi je kji, tjin tsojmì xi oro ko plata. Tikoáá tjin tsojmì xi yá ko xi ni'nde. Tjin tsojmì xi nachrjein nchijòn mochjeén koa tjin xi tà k'e mochjeén k'e nga ndaà tíma. ²¹ Tsà sìtsjeé kjohítsjeèn-ná nga kinchat'aàxìn-lá kjoa xi ch'o tjin, k'oaá s'ín sìkjeén-ná Nainá koni tsojmì tsjeè xi tà k'e mochjeén k'e nga ndaà tíma. Titsajnandaà nga sikitasoán njta mé xá-la Nainá xi ndaà tjin.

²² Ngaji Timoteo, tjsit'aàxìn-la kjohítsjeèn-la ixti xi ch'o tjin. Koi t'in tjingui-la xi kjoakixi, ko kjoa xi mokjeiin-ná jt'aà ts'e Cristo, ko kjoatjòcha, ko kjoa'nchán takòn. K'oas'ín t'in tjingui-la kjoa koi ko xita xi tsjeè tjin inima-la nga chjat'aà-la Nainá. ²³ Kì kjoa nchikón nìs'in-la xi nimé chji-la. Jyeé ndaà tjiin-lè nga kjoasiì ótsji. ²⁴ Jngoò ch'inda-la Nainá mìkì mochjeén nga kjoasiì skóngajiin. Ndaà kãtasiko yije xita. Kãtijnandaà nga kokòya 'én-la Nainá. Kãtas'e-la kjoatsetakòn mé kjoa xi mat'in. ²⁵ Koó kjondaà-la kãtasíkixiya jña xi xita kon-dra, tsà koi nachrjein Nainá tsjá isa-la nachrjein nga sìkájno jé-la nga mì tì jé kohótsji-ne mé-ne nga kokjeiin-la xi kjoakixi. ²⁶ K'e nga táx'anguì xkon, komaá kitjokàjiin kjoanachan-la neii nga ya tjit'aà'ño-la nga k'oas'ín sikitason-la koni s'ín mejèn-la neii.

3

Mé kjoa ch'o xi s'iin xita k'e nga tímachraña nga kjoehet'aà nachrjein

¹ Ngaji Timoteo, kàtasijiin-lè k'e nga tímachraña't'aà nachrjein nga kjoíi ìjngoò k'a-ne Cristo, k'jìn skoya kjoa s'e xi mìkìl ndaà t'jín. ² J'ña xita xi s'e, tà yijo-laá 'ñó s'is'in-la; toón 'ñó kotsjakeè; yijo-laá 'ñó ndaà s'ìkítsajna; xita 'nga ikoón koma; k'ichjajno-la Nainá kò xita; mìkìl k'ì'nchréñijon-la xita j'chínga-la; mìkìl tsjá ngajo-ne k'jondaà, mìkìl skoexkón Nainá, ³ mìkìl s'ìtjòkeè x'ikjín, jngoò k'a mìkìl s'ìje-la ikon, 'én ndiso tsját'in x'ikjín, mìkìl s'ìkinda yijo-la mé kjoa xi s'iin, xita ch'o koma, kondraá k'joi-la kjoa xi ndaà t'jín, ⁴ kondraá k'joi-la amigo-la, mìtsà ítjòn s'ìkítsjeèn mé kjoa xi s'iin, 'ñó 'nga ikon koma, jè s'ìtsjakeè kjoa ts'e isò'nde xi sasén-la yijo-la, mìkìl s'ìtsjakeè Nainá. ⁵ K'oaá s'ín s'iin koni tsà beèxkón Nainá, tanga mìkìl tsjá'nde nga jè nga'ñó-la Nainá s'ìxájiin inima-la.

Xita koi k'ì k'ì n'is'in-la. ⁶ J'ña xita koi, ótsji'nde-la nga fahas'en ni'ya-la íchjín xi mìkìl beèxkón yijo-la kò xi tse jé t'jín-la nga ma konachan-la. Íchjín koi, yaá fitjingui-la kjoa xi isa 'ñó ch'o t'jín koni s'ín mejèn-la yijo-la. ⁷ K'jit'aà nachrjein nchikota'ya 'én xitse tanga n'jngoò nachrjein fahas'en-jiin-la xi nguì kjoakixi. ⁸ J'ña xita koi, k'oaá t'is'ín binchahikon-la xi kjoakixi, koni kis'iin xita chjine xi ma-la bíndaà xi k'ì'mì Janes kò Jambres nga chinchahikon-la Moisés. Xita koi, jngoò k'aá ch'o t'jín k'johítsjeèn-la. Bitjongui-né nga nguixkon Nainá nga mìkìl mokjeiín-la xi kjoakixi. ⁹ Tanga mìkìl

sìikijne. Kijchò nachrjein nga skoe yije xita kjoa tònḁ-la. K'oaá s'ín jchat'in-la koni jè Janes ko Jambres.

Kó tsò Pablo nga bít'in-la Timoteo nga 'én kixi kokòya

¹⁰ Tanga ji Timoteo k'oaá s'ín tì'mìtjingui-la koni s'ín tsakoḁya-lè, koni s'ín tísíjchá yijo-na, koni s'ín tjín kjohítsjeèn-na mé kjoa xi tìfitjingui-la. K'oaá tìs'ín mokjeiín-lè koni s'ín mokjeiín-na 'an it'aà ts'e Cristo. K'oaá s'ín tjín kjoatsetakòn-lè ko kjoatjòcha-lè koni s'ín tjín ts'an. K'oaá tìs'ín chíkjoa yije-lè nita mé kjoa-ne koni 'an. ¹¹ Tíjìin-lè koni s'ín tìskiaán kjo'in it'aà ts'e Cristo tikoá ongatjingui-na xita kondra koni s'ín komat'ian ján naxandá Antioquia, Iconio ko Listra. ¡Taxki toòn kijtsee-na xita nga tsangatjingui-na tanga jè Na'èn-ná tsachrjekàjìin yije-na kjoa koi! ¹² Kixi kjoa, ngats'ii xi mejèn-la skoexkón Na'èn-ná Jesu-cristo, k'oaá tìs'ín s'e-la kondra nga kjitjinguikeè xita. ¹³ Tanga jña xita xi ch'o s'ín, xi konachan, kjit'aà nachrjein, saá 'ñó, saá 'ñó ch'o s'iiin nga skónachan-la xita, tanga k'oaá tìs'ín komat'in ngajo-ne nga skónachan-la xita xi kj'eíi.

¹⁴ Tanga ngaji, ndaà kixi tikoji jña kjoa xi kichità'yi xi jye k'oas'ín ndaà kòkjeiín-lè. Jyee tíjìin-lè yá xita xi tsakóya-lè. ¹⁵ Skanda tik'e-né nga tisa ndí ti tìtsjoi, kiyaxkoin Xojon Tsjeè-la Nainá jè xi koma-la sìichjine-lè kó s'ín kitjokàjìin kjo'in nga mokjeiín-lè it'aà ts'e Cristo Jesús. ¹⁶ Ngats'ii 'én xi tít'aà Xojon-la Nainá, kjohítsjeèn ts'eé Nainá nga kitjei. K'oaá s'ín mochjeén nga okóya-ná, nga okó-ná k'e nga ch'o 'nè, nga síkixiyandaà-ná, nga

okó-ná ndiyá kixi, ¹⁷ mé-ne jñá xi xita-la Nainá 'mì-ná jngoò k'a ndaà kitsajnandaá nga sikitasoán yije kjoa xi ndaà tjín.

4

Kó tsò Pablo nga tìbìnè-la Timoteo nga 'Én-la Nainá kichja

¹ N'ó tìbìnè-lè nga nguixkon Nainá ko Na'èn-ná Jesucristo jè xi jeya kjoíi ìjngoò k'a-ne koni xitaxá itjòn nga koìndaàjìin-la xita xi tìtsajnakon ko xi jye k'en. ² Tinókjoayi 'én ndaà-la Nainá xi kjoa ts'e Cristo. Tijnandeii nga kjit'aà nachrjein nita mé kjoa xi tjín. Chikoii xita k'e nga ch'o s'in; tikixiyi; tìt'in-la nga 'ñó kàt'eé-la ikon. K'e nga k'oas'in s'ìin, tseé t'ìin takoìn, ko kjondaà-lè takóya-la. ³ Kijchò nachrjein k'e nga jñá xita mì tì kii kòkjeiín-la nga kji'nchré 'én ndaà xi kixi tjín xi jñá okoòyaá it'aà ts'e Cristo. Kjin maestro kohótsji xi kòkóya-la kjoa xi jñà komejèn-la nga kji'nchré-la. ⁴ Kinchat'aàxin-la xi kjoakixi, koii kjit'aà-la xi taxki cuento jchínga xi mìtsà kixi kjoa. ⁵ Tanga ngaji Timoteo, indaà t'è-la takoìn nita mé kjoa-ne, tikjeiín kjoa ts'e kjo'in, koi xá t'ìin nga tika'bisoìn 'én ndaà-la Nainá xi kjoa ts'e Cristo, ndaà tikitasoìn xá xi jì kjòngatsjei.

⁶ An, jye tìtsjaà kjotjò-la yijo-na Nainá. Jyeé ijchò nachrjein nga kiyá. ⁷ Jyeé ndaà kiskaàn-tjià xá-la Cristo; jyeé ndaà kisikitasoàn xá xi 'an kjòngatsja; jyeé ndaà tshótijnakoaa jè 'én xi mokjeiín-na it'aà ts'e Cristo. ⁸ I'ndeji, Cristo, xi xitaxá kixi tjina, tijnatjò jngoò-la corona ján ngajmii xi 'an tsjá-na nga kixi tshótijnakoaa. K'e nga kjoíi ìjngoò k'a-ne,

mìtsà tà 'an xi tjoé-na. Tìkoaá tjoé-la ngats'ìi xìta xi tíjngò ikon nga nchikoña-la Cristo.

Kó kitsò Pablo nga kisixátíya-la Timoteo nga kjoikon nìton

⁹ Tìxátíyi nga nìton nchrobáchon-ná. ¹⁰ Nga jè Demas, jyeé kitsjeiìn takòn-na. Jè 'ñó matsjakeè kjoa xi tjin i isò'nde. Ján kii naxandá Tesalónica. Crescente, ján kii nangui Galacia, koa jè Tito ján kii nangui Dalmacia. ¹¹ Tà jè Lucas tíjnakò-na. K'è nga kjinchroboi, tjajchatoi Marcos, nchrobákoii. Kòchjeén-na kjoa ts'e xá xi tjin-na. ¹² Jè Tíquico, ján kisikasén Éfeso. ¹³ K'è nga kjinchroboi, jcha-ná inchrókisòn-na xi tsakajná ya naxandá Troas ya ni'ya-la Carpo. Jch'ii xojon-na; jña xi isa 'ño mochjeén-na xi chrjoa kjoàn.

¹⁴ Alejandro, jè xi chjine kicha, 'ño ch'o tjin kjoa xi tísikò-na. Nainá, jè kàtatsjá-la kjo'in kjoa xi tís'in. ¹⁵ Ngaji Timoteo, tikindji yijo-lè it'aà ts'e xita jè. 'Ñó kondra fitjingui-la 'én xi okoðyaá.

¹⁶ K'è nga kisindaàjìin ítjòn-na nga nguixkon xitaxá, niyá xi tsasikò-na. Ngats'ìi xita kitsjeiìn takòn-na. Kì kindáá s'in Nainá kjoa koi. ¹⁷ Tanga Na'èn-ná tsasikò-na. Kitsjaà-na nga'ño mé-ne nga komà kichjàjìin-la jña xita 'én ndaà-la Nainá xi kjoa ts'e Cristo. K'oaá s'in komà-ne nga kii'nchré yije xi mìtsà xita judío. Nainá tsasikò-na nga mìkii kisik'en-na xita xi tsibíndaàjìin-na. ¹⁸ Na'èn-ná kosikò-na it'aà ts'e ngats'ìi kjoa xi ch'o tjin. Kjiko-na ñánda tíhotíxoma ján ngajmiì. Nainá, kàtas'e-la kjoajeya nita mé nó-ne nita mé nachrjein-ne. K'oas'in kàtama.

Xi fehet'aà-ne, Pablo síhixat'aà x̄it̄a x̄ik̄j̄ín

¹⁹ T̄ixat'eì jè Priscila k̄o Aquila k̄o x̄it̄a ni'ya-la Onesíforo. ²⁰ Erasto, ján tsibìj̄na nax̄andá Corinto. Jè Trófimo, ján kisìk̄j̄na nax̄andá Mileto. Xk'én-né.

²¹ T̄ixát̄iyi nga n̄it̄on nchrobáchón-ná k'è nga t̄ik̄j'è f'ì n̄chrjein choòn 'nchán. Tísíhixat'aà-lè Eubulo, Pudente, Lino k̄o Claudia, k̄o ngats'ìi x̄it̄a xi 'ndsè chibá.

²² Jè k̄at̄ijnako-lè Jesucristo xi ot̄ixoma-ná. Ngats'ioò, jè k̄at̄ijnako-nò k̄j̄ondaà-la. K'oas'ín k̄atama.

'Én-lá Nainá xi kjoa ts'e Jesucristo
New Testament in Mazatec, San Jerónimo Tecóatl
Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Jul 2024 from source files
dated 29 Jan 2022

9f778253-d34e-5037-af35-7bca16479aa0